

**POSLOVNIK O RADU SKUPŠTINE
SAVEZA OPĆINA I GRADOVA
FEDERACIJE BOSNE I HERCEGOVINE**

decembar/prosinac 2008. godine

Na osnovu člana 19. Statuta Saveza općina i gradova Federacije BiH («Službene novine Federacije BiH», broj 29/08), Skupština Saveza općina i gradova Federacije Bosne i Hercegovine na sjednici održanoj dana 16.04.2009. godine u Neumu d o n o s i

POSLOVNIK O RADU SKUPŠTINE SAVEZA OPĆINA I GRADOVA FEDERACIJE BOSNE I HERCEGOVINE

I OPĆE ODREDBE

Član 1.

Poslovníkom o radu Skupštine Saveza općina i gradova Federacije Bosne i Hercegovine (u daljnjem tekstu: Poslovnínik) uređuje se:

- Zakazivanje Skupštine Saveza općina i gradova Federacije Bosne i Hercegovine (u daljnjem tekstu: Skupština) i verifikacija mandata članica-predstavniká članova Saveza općina i gradova Federacije Bosne i Hercegovine (u daljnjem tekstu: Savez);
- Način rada i odlučivanja Skupštine;
- Izbor, imenovanja i razrješenja u organima i tijelima Saveza;
- Postupak odlučivanja o prijemu novih članica Saveza;
- Prava i dužnosti članica Skupštine - ovlaštenih predstavniká općina i gradova;
- Akti Skupštine;
- Druga pitanja od značaja za rad Skupštine.

Član 2.

Svaka članica Skupštine ima pravo i dužnost prisustvovati i sudjelovati u radu Skupštine u skladu sa Statutom Saveza i ovim poslovnínikom.

Član 3.

Pitanja u vezi sa načinom rada Skupštine, koja nisu uređena Statutom Saveza i ovim poslovnínikom, Skupština uređuje zaključkom.

Zaključak iz prethodnog stava primjenjuje se od dana donošenja.

Zaključak iz stava 1. ovog člana ne smije biti u suprotnosti sa odredbama Statuta Saveza i ovog poslovnínika.

Član 4.

Sjednice Skupštine su:

1. izborne sjednice;
2. redovne sjednice.

Član 5.

Osim ako Statutom Saveza nije drugačije određeno, izborne sjednice Skupštine se održavaju nakon lokalnih izbora u roku utvrđenom Statutom.

Redovne sjednice Skupštine Saveza održavaju se po potrebi, a najmanje jedanput godišnje u skladu sa odredbama Statuta Saveza.

II ZAKAZIVANJE SKUPŠTINE I VERIFIKACIJA MANDATA

Član 6.

Izbornu sjednicu Skupštine saziva i predlaže Skupštini na usvajanje Dnevni red, predsjedavajući Skupštine iz prethodnog mandata ili njegov zamjenik.

Prijedlog za sazivanje izborne sjednice Skupštine mogu podnijeti ovlašteni predlagači iz člana 11. stav 3. Poslovnika.

Član 7.

Predsjedavajući Skupštine ili njegov zamjenik rukovode izbornom sjednicom Skupštine do izbora članova verifikacione komisije i radnog Predsjedništva.

Član 8.

Radom Skupštine predsjedava radno Predsjedništvo do izbora predsjedavajućeg Skupštine u skladu sa Statutom Saveza.

Član 9.

Verifikacionu komisiju čine predsjednik i dva člana koje bira Skupština na prijedlog predsjednika Predsjedništva.

Verifikaciona komisija utvrđuje broj prisutnih predstavnika članica.

Na osnovu izvještaja verifikacione komisije, verifikaciju mandata članicama Skupštine - ovlaštenim predstavnicima općina i gradova vrši Skupština.

Član 10.

Verifikacijom mandata, članice Skupštine stiču sva prava i dužnosti utvrđene Statutom Saveza i ovim Poslovníkom.

III NAČIN RADA I ODLUČIVANJA SKUPŠTINE

Član 11.

Redovnu sjednicu Skupštine saziva predsjedavajući Skupštine.

U slučaju spriječenosti ili odsutnosti predsjedavajućeg Skupštine, sjednicu Skupštine iz prethodnog stava, saziva i njome predsjedava zamjenik predsjedavajućeg Skupštine.

Prijedlog za sazivanje Skupštine mogu dati Predsjedništvo Skupštine ili najmanje deset članica Saveza.

U slučaju iz prethodnog stava predsjedavajući Skupštine dužan je sazvati redovnu sjednicu Skupštine u roku određenom Statutom Saveza.

Član 12.

Predsjedavajući Skupštine u dnevni red Skupštine unosi ona pitanja koja su sadržana u prijedlogu ovlaštenih predlagača iz člana 11. stav 3. ovog poslovnika.

Član 13.

Uz poziv za sjednicu Skupštine sa prijedlogom Dnevnog reda, članicama Skupštine se dostavlja materijal koji je predmet raspravljanja i odlučivanja na sjednici Skupštine.

Poziv za sjednicu Skupštine sa prijedlogom Dnevnog reda i materijalima iz prethodnog stava ovog člana dostavlja se obrađivačima materijala, a može se dostaviti i sredstvima javnog informisanja i drugim pozvanim osobama o čemu odlučuje predsjedavajući Skupštine u konsultaciji sa Stručnom službom Saveza.

Član 14.

Sjednici Skupštine, u ime članice Saveza može prisustvovati i učestvovati u radu sa pravom odlučivanja načelnik/gradonačelnik, predsjedavajući općinskog/gradskog vijeća ili osoba koja ima pismeno ovlaštenje načelnika/gradonačelnika za prisustvo i učešće u radu na sjednici.

Pored članica Saveza, sjednici Skupštine mogu prisustvovati svi pozvani predstavnici državnih, međunarodnih, stranih i drugih organa i organizacija bez prava odlučivanja.

Član 15.

Skupština može punovažno raditi i odlučivati ako sjednici Skupštine prisustvuje više od polovine članica Saveza.

Skupština odlučuje u skladu sa odredbama Statuta Saveza i ovog poslovnika. Glasanje je u pravilu javno.

Član 16.

Predsjedavajući Skupštine otvara sjednicu i na početku sjednice utvrđuje da li postoji kvorum za održavanje sjednice.

Nakon što utvrdi da sjednici prisustvuje dovoljan broj članica Saveza za punovažno raspravljanje i odlučivanje, predlaže prisutnim članicama Dnevni red sjednice.

Prijedlog za izmjene ili dopune Dnevnog reda na sjednici Skupštine može dati Predsjedništvo Skupštine ili svaka članica.

Član 17.

Po usvajanju Dnevnog reda sjednice Skupštine, predsjedavajući Skupštine vodi sjednicu u skladu sa usvojenim Dnevnim redom.

Na sjednici se raspravlja o svakoj tački dnevnog reda.

Član 18.

Rasprava o svakoj tački Dnevnog reda započinje uvodnim izlaganjem obrađivača ili predlagača materijala, nakon čega se daje riječ ostalim prisutnim.

Predsjedavajući zaključuje raspravu po svakoj tački dnevnog reda kad utvrdi da nema više prijavljenih za diskusiju.

Član 19.

Niko ne može govoriti na sjednici Skupštine prije nego što zatraži i dobije riječ od predsjedavajućeg.

Predsjedavajući osigurava da govornik ne bude ometan i daje riječ članicama Skupštine po redu kojim su se prijavili.

Izuzetno, Skupština može odrediti i vrijeme trajanja izlaganja, odnosno, učešća u raspravi.

Član 20.

Na prijedloge Predsjedništva Saveza ili članica Saveza, predstavnici članica Saveza mogu ulagati amandmane.

O predloženim amandmanima Predsjedništvo Saveza zauzima stav sa kojim je dužno upoznati Skupštinu.

Konačnu odluku glasanjem donosi Skupština.

Član 21.

Nakon što predsjedavajući Skupštine konstatira da više nema prijavljenih za diskusiju zaključuje raspravu i pristupa se odlučivanju.

Skupština odlučuje o prijedlogu, koji može usvojiti, odbiti ili odložiti izjašnjavanje radi proučavanja određenih pitanja.

Odluka se smatra donesenom ako je za nju glasala natpolovična većina prisutnih članica Skupštine, osim ako Statutom Saveza nije drugačije određeno.

Član 22.

O radu Skupštine vodi se zapisnik.

O sastavljanju i potpisivanju zapisnika brine se predsjedavajući Skupštine.

Član 23.

Na Skupštini se utvrđuje zapisničar koji će sa predsjedavajućim Skupštine potpisati zapisnik.

Zapisnik sadrži osnovne podatke o radu Skupštine.

Sjednice Skupštine se tonski snimaju.

Član 24.

Na sjednici Skupštine osigurava se prisustvo medija i javnih glasila.

IV IZBORI, IMENOVANJA I RAZRJEŠENJA U ORGANIMA I TIJELIMA SAVEZA

Član 25.

Skupština bira predsjedavajućeg Skupštine, zamjenika predsjedavajućeg Skupštine, Predsjedništvo Skupštine i bira i imenuje druge organe i tijela Saveza u skladu sa Statutom Saveza.

Postupak izbora, imenovanja i razrješenja osoba i organa iz prethodnog stava ovog člana vrši se u skladu sa odredbama Statuta Saveza i ovog poslovnika.

Član 26.

Odredbe ovog poslovnika, koje se odnose na postupak izbora i imenovanja, shodno se primjenjuju i na postupak razrješenja i potvrđivanja izbora i imenovanja.

Član 27.

Postupkom izbora i imenovanja rukovodi predsjedavajući Skupštine.

Izbor i imenovanja vrše se javnim glasanjem, osim ako Skupština drugačije ne odluči.

Ako se izbor ili imenovanje vrši tajnim glasanjem, predsjedavajućem Skupštine pomaže zamjenik predsjedavajućeg i dva predstavnika članica Saveza, koje on odredi.

Član 28.

Prijedlog za izbor i imenovanja podnose ovlašteni predlagači u skladu sa Statutom Saveza.

Član 29.

Odluka o izboru ili imenovanju je donesena ako je za nju glasala natpolovična većina prisutnih članica Saveza, osim ako Statutom Saveza nije drugačije određeno.

Glasanje o prijedlogu za izbor, odnosno imenovanje vrši se za svakog kandidata posebno.

Izuzetno, kada se bira kolektivni organ ili tijelo Saveza glasa se za listu u cjelini, osim ako se ne radi o izmjeni ili dopuni njihovog sastava.

Član 30.

Kada se izbor, odnosno imenovanje vrši tajno, glasanje se vrši glasačkim listićima.

Glasački listići su iste veličine, oblika i boje.

U glasački listić se unose imena svih kandidata onim redoslijedom kako su predloženi odnosno sve kandidatske liste.

Ispred imena kandidata stavlja se redni broj.

Na svaki glasački listić mora biti utisnut pečat Saveza.

Član 31.

Svaka članica Saveza dobija jedan glasački listić.

Nakon što utvrdi da je svaka članica Saveza dobila glasački listić, predsjedavajući Skupštine objašnjava način glasanja.

Po obavljenom glasanju stavlja se presavijeni glasački listić u glasačku kutiju.

Član 32.

Kada se glasa za kandidate pojedinačno, glasa se za kandidata na taj način što se zaokružuje redni broj ispred imena tog kandidata.

Kada se glasa o kandidatskoj listi, glasa se za kandidatsku listu u cjelini na taj način što se zaokružuju riječi " za listu " ili " protiv liste ".

Član 33.

Nakon što svi predstavnici članica Saveza glasaju i predsjedavajući Skupštine objavi da je glasanje završeno, pristupa se utvrđivanju rezultata glasanja.

Rezultat glasanja se utvrđuje na osnovu predatih glasačkih listića u sali u kojoj se održava sjednica.

Glasački listić iz kojega se ne može utvrditi za kog kandidata, odnosno za koju kandidatsku listu je neko glasao, smatra se nevažećim.

Predsjedavajući Skupštine objavljuje rezultate glasanja i saopćava koliko je ukupno predstavnika članica Saveza glasalo, koliko od toga za pojedine kandidate, odnosno kandidatske liste i koliko ima nevažećih glasačkih listića.

V POSTUPAK ODLUČIVANJA O PRIJEMU NOVIH ČLANICA SAVEZA

Član 34.

Na sjednici Skupštine donosi se Odluka o prijemu novih članica u Savez općina i gradova Federacije Bosne i Hercegovine, na osnovu dostavljenih i potpisanih Sporazuma o međusobnoj saradnji u Savezu općina i gradova Federacije Bosne i Hercegovine.

Član 35.

Odluka o prijemu novih članica u Savez uvijek se razmatra kao prva tačka dnevnog reda, kako bi sve članice Saveza mogle ravnopravno da učestvuju i odlučuju na sjednici Skupštine.

Odluka iz prethodnog stava ovog člana donosi se javnim izjašnjavanjem, natpolovičnom većinom broja prisutnih članica Skupštine.

V PRAVA I DUŽNOSTI ČLANICA SAVEZA – OVLAŠTENIH PREDSTAVNIKA OPĆINA I GRADOVA

Član 36.

Svaka članica Saveza - ovlašteni predstavnik općine i grada, u Skupštini ima pravo i dužnost da:

- a) prisustvuje, učestvuje u radu i glasa na sjednicama Skupštine,
- b) predlaže izmjene i dopuna dnevnog reda u skladu sa odredbama ovog poslovnika,
- c) pokreće inicijative za donošenje novih i izmjene i dopune Statuta Saveza, Poslovnika Skupštine, odluka i drugih općih i pojedinačnih akata iz nadležnosti Skupštine Saveza,
- d) predloži ili inicira raspravu o bilo kom pitanju iz nadležnosti Skupštine,
- e) podnese amandmane na odluke i druge akte, koje donosi Skupština u okviru svoje nadležnosti,
- f) da zatraži i dobije sve materijale i informacije vezane za rad Skupštine i svih drugih organa i tijela Saveza.

VI AKTI SKUPŠTINE

Član 37.

Skupština u okviru svoje nadležnosti donosi statut, odluke, rješenja, planove, programe i druge opće i pojedinačne akte u skladu sa Statutom Saveza i odredbama ovog poslovnika.

Član 38.

Akte iz prethodnog člana ovog poslovnika potpisuje predsjedavajući Skupštine ili njegov zamjenik.

Član 39.

O objavljivanju i čuvanju akata iz člana 37. Poslovnika stara se direktor Saveza.

VII ZAVRŠNE ODREDBE

Član 40.

Troškovi putovanja i boravka predstavnika članica Saveza na sjednici Skupštine snose članice Saveza.

Član 41.

Stupanjem na snagu ovog poslovnika prestaje da važi Poslovnik o radu Skupštine Saveza općina i gradova Federacije BiH, broj: 123/07 od 22.03.2007. godine.

Član 42.

Ovaj poslovnik stupa na snagu danom donošenja, a objavit će se na web-stranici Saveza gradova i općina Federacije Bosne i Hercegovine.

Neum, 16.04.2009. godine
broj: 160/09

Predsjedavajući Skupštine Saveza

Ivo Jerkić, s.r.